



Ramai gadis Orang Asli menjanda

Pati berkahwin semata-mata berlindung daripada diburu pihak berkuasa

KAMPUNG Sendrop, Lojing yang didiami suku kaum Temiar.

Oleh Ramli Ibrahim
am@hmetro.com.my

Gua Musang

Ibu bapa Orang Asli suku kaum Temiar di beberapa kampung sekitar Lojing, dekat sini, bimbang apabila anak gadis mereka menjadi 'buruan' lelaki pendatang asing tanpa izin (Pati) untuk berkahwin.

Malah, mereka mendakwa ramai anak gadis kaum itu yang sudah berumah tangga dengan lelaki warga asing hidung belang bertukar menjadi janda apabila mereka pulang ke negara asal.

Antara kampung Orang Asli menjadi tumpuan warga asing untuk memikat anak gadis Orang Asli termasuk

di Kampung Sendrop, Seng Sang, Sang Wai, Jek Jok dan Kampung Brooke.

Penghulu Orang Asli Kampung Sendrop, Andol Busu Jamin berkata, masalah berlaku sejak beberapa tahun lalu itu amat sukar disekat keluarga yang memiliki anak gadis.

Beliau berkata, ini kerana kebanyakan lelaki Pati yang bekerja di ladang sayur berhampiran kampung kaum itu ada hubungan sulit dengan anak gadis mereka tanpa diketahui ibu bapa.

Menurutnya, ramai Pati yang bekerja di ladang sayur itu membabitkan warga Bangladesh, Indonesia dan Pakistan.

"Kadangkala anak gadis Orang Asli hilang dari rumah dibawa keluar lelaki Pati itu dan apabila pulang

semula dua atau tiga hari kemudian, mereka menyatakan sudah bernikah.

"Keluarga tidak tahu di mana mereka bernikah dan tidak mendapat restui ibu bapa hingga menimbulkan masalah besar kepada kaum ini," katanya ketika ditemui di Kampung Sendrop, semalam.

Penghulu Orang Asli Kampung Brooke Lama, Rian Bujang berkata, kini ramai anak perempuan kaum itu berstatus janda akibat ditinggalkan suami warga asing yang pulang ke negara asal.

Katanya, anak hasil perkongsian hidup mereka yang ditinggalkan 'gantung tak bertali' itu dijaga ibu bapa sehingga membebankan perbelanjaan mereka.

"Lebih menghairankan, ada perempuan anak Orang

Asli boleh bertukar suami dengan lelaki rakan warga asing sama apabila suami asalnya pulang ke negara asal.

"Sehubungan itu, saya bersama semua penghulu Orang Asli sedang meneliti perkara itu dan mungkin sepakat untuk membuat laporan polis.

"Memang sudah ada janda Orang Asli serik berumah tangga dengan lelaki pendatang asing yang hanya se-kadar untuk hidup menumpang, tetapi tidak bertanggungjawab," katanya.

Dia mendakwa pendatang asing berkahwin dengan gadis Orang Asli semata-mata untuk mencari tempat perlindungan bagi mengelak diburu pihak berkuasa.



Lebih menghairankan, ada perempuan anak Orang Asli boleh bertukar suami dengan lelaki rakan warga asing sama apabila suami asalnya pulang ke negara asal"

Rian Bujang



Kadangkala anak gadis Orang Asli hilang dari rumah dibawa keluar lelaki Pati itu dan apabila pulang semula dua atau tiga hari kemudian, mereka menyatakan sudah bernikah"

Andol Busu Jamin

